

Was merr su babbeld

Wer hodden oogerufe?
Ei dess Kättche.
Was hottsen gewollt?
Ei nix.
Wie, ei nix?
Ei nix Besonderes.
Irschendebbes werrd se doch gewollt hawwe.
Sie wollt wisse, wies uns gieht.
Unn? Wie giehts uns?
Altersgerecht habb isch gesaad.
Unn wie giehts dene?
Aach altersgerecht.
Unn dess war alles?
Sei nitt su neigierisch.
Aha. Also war doo noch ebbes, was donn?
Su Frauesache.
Ach so. Ennschuldische.
Nix Schlimmes, Honnes.
Donn isses joo gut.
Isch soll derr enn scheene Gruß ausrischde.
Vumm Kättche?
Naa, vumm Schorsch.
Donkeschee. Was mähderrn, de Schorsch?
Der war im Keller.
Unn dut bastele, gelle?
Ja. Unn der wollt disch emol oorufe.
Warum isser donn nitt gleisch onns Telefon?
Der war doch im Keller.
Ah ja. Was häddern gewollt?
Du häddsdem ebbes halle solle.
Ebbes halle solle?
Weil de Schorsch hädd joo koo drei Händ.
Doo werrderr widder ebbes geklebd hawwe.
Wie, ebbes geklebd hawwe?
Ja, geklebd. Beim Klewe muss merr drigge.
Unn doodeferr braucht merr drei Händ?
Monschmol. Su long bis de Kleber trocke iss.
Was isses dess, was de Schorsch bastele dut?
E Fährr ferr oon vunn soine Enkel.
Er basteld e Fährrschiff?
Naa. E Fährr wie se frieher in Flerschem war.
Doodefoo duts doch ahle Fotos gewwe.
Awwer de Enkel will ebbes probiern.
Mett de Fährr vumm Schorsch?
Ja. Wie e Fährr iwwer de Moo kumme iss.

Was e Frooch. Ei geschwumme.
Ja, geschwumme. Awwer frieher ohne Motor.
Klar. Unn wie issen dess vor sisch gonge?
Grad dess will de Enkel wisse.
Unn isch aach. Also?
De Moo hott die Fährr eniwwer gedriggd.
Unn widder eriwwer?
Ja. De Moo hotts gemachd, gons alloo.
Unn wieso?
Die Fährr iss schreesch gestellid worrn.
Unn?
Unn donn hotts Wasser die Fährr gedriggd.
Isch kann merr dess nitt vorstelle.
Emm Schorsch soinn Enkel aach nitt.
Unn dessdeweese?
Dut de Schorsch ferr de Enkel die Fährr baue.
Unn die Fährr wolle die zwaa schwimme losse?
Erst emol de Schorsch unn isch.
Uffem Moo?
Nitt uffem Moo. Uffem Wickerbach.
Uffem Wickerbach?
Ja, onn dem Briggsche vor de Wissemiehl.
Unn donn giehderr ooner drinke?
No klar.
Was enn Uffwond.
Wie, Uffwond?
E Fährr ze bastele, um widder emol ohne eier
Fraue ooner drinke gieh ze könne.

Eiern Honnes